

## Evening Dogri News Bulletin

07 Oct.. 2025 18:15 Hrs

### Headlines

- प्रधानमंत्री नरेन्द्र मोदी होरें राष्ट्र सेवा दे 25में बरे च प्रवेश करदे होई विकसित भारत दे सुखने गी मूर्त रुप दने लेई किट्ठे रलियै जतन करने दा आहवान कीता ऐ।
- केन्द्र सरकार नै जम्मू-कश्मीर दे करसानें लेई PM-KISAN योजना दी 21मीं किश्त पेशगी जारी कीती, उपराज्यपाल ते मुखमन्त्री होरें प्रधानमंत्री ते केन्द्री कृषि मंत्री हुंदा आभार प्रगट कीता।
- मुखमन्त्री उमर अब्दुल्ला होरें 2025-26 आले माली बरे दे CAPEX ते हलका विकास फंड दे कम्में ते प्रगति दी समीक्षा कीती।
- जम्मू-कश्मीर च इस स्याले दी पैहली बरखा ते बर्फबारी दे बाद तापमान च गिरावट आई ऐ।
- कैई थाहरें पस्सियां ते पहाड़ें पर कुप्पड़ पौने कारण जम्मू-श्रीनगर राष्ट्रीय जरनैली सिड़क ते होर कैई प्रमुख रस्तें पर गड़्डियें दी आओ-जाई प्रभावत।

<><><><><><>

### PM Modi 25 Years

प्रधानमंत्री नरेन्द्र मोदी होरें शासन अध्यक्ष दे रुपै च देश दी सेवा करने दे अपने 25में बरे च प्रवेश करदे मौके 2047 तगर भारत गी इक विकसित मुख्य बनाई दस्सने दे सुखने गी सच

करने लेई सब्भनै गी कन्नै लेइयै सांझे जतन करने दा धेइया कीता ऐ ते औने आहले बरे च होर मते निग्गर ते अथनक जतन करने दे संकल्प गी दोहराया ऐ। प्रधानमंत्री नरेन्द्र मोदी होरें आखेया ऐ जे मुख्यै च पिच्छले 11एं बरे च बड़ा मता ते सुधारात्मक बदलाव आया ऐ ते सरकार दे जतनै दी बदौलत महिलां करसान ते नौजवानें दे सशक्तिकरण दे कन्नो-कन्नी 25 करोड़ कोला मते लोक गरीबी कोला बाहर आए न। सोशल मीडिया “एक्स” पर इक पोस्ट च मोदी होरें आखेया जे भारत दी कुलसंसारी अर्थव्यवस्था च महत्वपूर्ण थाहर ऐ। मोदी होरें आखेया जे देसै च बुनियादी ते प्रमुख सेहत दिक्खभाल ते समाजी सुरक्षा स्कीमां चलै करदियां न ते सरकार हर इक क्षेत्र च बड़्डे पैमाने पर बदलाव ते सुधार आहन्नै करदी ऐ। सरकार दा उद्देश्य सब्भनै क्षेत्रें च आत्मनिर्भरता हासल करना ऐ जेहदे नै सब्भनै गी इस गल्लै दा मान होऐ जे इस्तमाल आहली हर चीज भारत च बनी दी ऐ ते पूरी चाल्ली स्वदेशी ऐ।

<><><><><><>

PM Kissan LG -CM

जम्मू-कश्मीर च करसानें गी बड़्डी राहत पुजांदे होई भारत सरकार नै “**प्रधानमंत्री किसान सम्मान निधि पी.एम. किसान**” स्कीम दी 21मीं किश्त पेशगी जारी कीती ऐ। उपराज्यपाल मनोज सिन्हा ते मुखमंत्री उमर अब्दुल्ला होरें समें-सिर समर्थन उपलब्ध कराने लेई प्रधानमंत्री नरेन्द्र मोदी ते केन्द्री राई-बाई मंत्री शिवराज सिंह चौहान हुंदा धन्नवाद ते आभार प्रगट कीता ऐ। इक सोशल मीडिया पोस्ट च एल.जी होरें दस्सेया जे इस किश्त तैहत कोई 8 लक्ख 55 जहार योग्य करसानें गी इक अरब 71 करोड़ रपे दी सिद्धे उन्दे बैंक खातें च पुज्जी गेई ऐ। उनें आखेया जे इस मदाद दी करसानें गी बड़ी मती लोड़ ही ते एहदैं नै उनेंगी अपनी रोजी-रुट्टी दी बवस्था करने ते राई-बाई दियें गतिविधियें गी परतियै ब्हाल करने च मदद थ्होग। उनें

अगगे आखेया जे स्हाड़े करसान स्हाड़ी अर्थव्यवस्था दी रीढ़ न ते केन्द्र सरकार इनेंगी आत्मनिर्भर, खुशहाल ते सशक्त बनाने लेई उनेंगी हर मुमकिन मदद देने लेई पूरी चाल्ली वचने बज्झी दी ऐ।

<><><><><><>

#### Viksit Bharat Buildathon (Byte)

शिक्षा मंत्रालय नीति आयोग दे अटल इनोवेशन मिशन कन्नै रलियै विकसित भारत बिल्डथॉन-2025 दा आयोजन करा रदा ऐ। एह बिल्डथॉन 6मीं थमां लेइयै 12मीं जमात तगर दे विद्यार्थिये लेई अपनी रचनात्मकता ते नवाचार गी प्रदर्शित करने आस्तै इक राष्ट्रीय मंच ऐ। ग्रुप कैप्टन शुभांशु शुक्ला, जेहड़े भारतीय अंतरिक्ष यात्री न, इस पैहलकदमी दे ब्रांड एम्बेसडर दे तौरा पर कम्म करा रदे न। उनें विद्यार्थिये गी इस कार्यक्रम च सक्रियता कन्नै हिस्सा लैने आस्तै प्रोत्साहित करदे होई आखेया जे हर विचार, भाएं ओह कुसे बी आकार दा होए, विकसित भारत-2047 दे नजरिये गी साकार करने ते आत्मनिर्भर भारत गी बढ़ावा देने च योगदान देई सकदा ऐ।

<><><><><><>

#### Vidyanjali CSR –Education

शिक्षा मंत्रालय नै “विद्यांजली CSR” पैहल तैहत जम्मू-कश्मीर सनें 13 राज्ये ते केन्द्र शासित प्रदेश च 120 परियोजनाएं दी घोषणा कीती ऐ जिन्दी मदद नै स्कूलें च खेड्डें, कलाएं, पढ़ाई कन्नै जुड़ी दिये होरनें गतिविधिये गी मदद थोग। इनें परियोजनाएं दा मकसद विद्यार्थिये गी अपनी प्रतिभा गी पछानने दा मौका देना, नरोआ जीवन जीने लेई प्रेरत करना, खेड्ड

गतिविधियें राएं आत्मविश्वास बधाना, सिखने ते बधने मठोने लेई इक साजगार माहौल ते बवस्था उपलब्ध कराना ते उन्दे अंदर सृजनात्मकता गी बढ़ावा देना ऐ। इस चाली दियें परियोजनाएं गी समर्थन देने कन्नै कारोबारी इदारें, गैर सरकारी संगठन, समाज प्रति अपनी जिम्मेदारी तैहत बड़ी मदद करदे न। नेह प्रोजैक्टें कन्नै स्कूलें च बेहतर माहौल ते बवस्थाएं दी दस्तेयाबी यकीनी बनदी ऐ।

<><><><><><>

Poshan Maah Ramban (Byte)

जीवन दे हर चरण च पोषण जागरुकता बधाने आस्तै रामबन दा जिला प्रशासन बड़े जोरें-शोरें कन्नै पोषण महीना मना करदा ऐ। इस पैहलकदमी दे इक हिस्से दे तौरा पर अज्ज पोगल इलाके च राष्ट्रीय पोषण अभियान दे तैहत पोषण (आई.सी.डी.एस.) रामबन आस्सेया इक विशेष कैम्प दा सरिस्ता कीता गया। इस कैम्प च आंगनवाड़ी केन्द्रें राएं बच्चें, किशोर, कुडियें ते गर्भवती ते दुध पलेआने आहली महिलायें दे पूरे-पराते विकास ते पोषण पर ध्यान केन्द्रित कीता गया। इस दौरान पूरक पोषण, सेहत सेवां, जागरुकता अभियान ते लाभार्थियें गी सेवा दस्तयाब करोआने च सुधार आस्तै आंगनवाड़ी कार्यकर्ताएं गी सिखलाई देना शामिल ऐ। आकाशवाणी समाचार कन्नै गल्ल करदे होई पोगल दे प्राइमरी हैल्थ सेंटर दे सुपरवाइज़र सबाहत जिलानी होरें आखेया..

<><><><><><>

CM-CAPAX Review

मुख्यमंत्री उमर अब्दुल्ला होंरें 2025-26 आहले माली बीरे दे Capex फंड ते हलका विकास फंड दे खर्चें अखराजातें बारे इक व्यापक जायजा बैठक दी अध्यक्षता कीती। बैठक दौरान बक्ख-बक्ख जिलें ते मैहकमें साब्बै CAPEX ते हलका विकास फंड दे तैहत होए दे कम्में ते प्रगति दे बारे मूलांकन कीता। इस दौरान मुख्यमंत्री होंरें सब्भनैं मैहकमे गी निर्देश दिता जे सारे कम्में गी बीम्स पोर्टल पर सौ प्रतिशत चाढ़ेया जा। उनें आखेया जे हलका विकास फंड तैहत कीते जाने आहले कम्मे लेई सरबन्धित विधायकें कन्ने नेइमा तालमेल बनाइयै कम्म कीता जा ते कन्ने इस गल्लै गी बी यकीनी बनाया जा जे इनें जतनें ते नतीजें जमीनी सतह पर सामने लब्भन।

<><><><><><>

Kishtwar Exhibits

किश्तवाड़ जिले आस्तै इक गौरवपूर्ण पल च राष्ट्रीय सतह दी 52मीं समग्र बाल वैज्ञानिक विज्ञान प्रदर्शनी लेई दंडु परियोजनाएं गी चुनेया गया ऐ। एह प्रोजैक्ट 4 अक्टूबर 2025 गी एस.सी.ई.आर.टी जम्मू आसेया आयोजित डिवीजनल स्तरी प्रतियोगिता च सामने आए। इक परियोजना हायर सैकन्ड्री स्कूल किश्तवाड़ थमां ट्रांसपोर्ट ते संचार कन्ने सरबन्धत ही, जदके दूई सरकारी हायर सैकन्ड्री स्कूल सरथल दे इक विद्यार्थी आसेया “संसाधन प्रबंधन” पर केन्द्रित ही। एह उपलब्धी राष्ट्रीय स्तर पर किश्तवाड़ दे युवा विद्यार्थियें दी वैज्ञानिक प्रतिभा ते रचनात्मकता गी दर्शादी ऐ।

<><><><><><>

Cyber Fraud Jammu (Byte)

जम्मू-कश्मीर च साईबर धोखाधड़ी दे मामले च बाददे दे मद्देनजर जम्मू-कश्मीर दे मद्देनजर, जम्मू-कश्मीर दे एस.एस.पी. जोगिंदर सिंह होरें लोकें गी सोहगा-सतर्क रोहने दी अपील कीती ऐ। अज्ज इक संवाददाता सम्मेलन च उनें जागरुकता दे महत्व पर जोर दिंदे होई डिजिटल धोखाधड़ी, साईबर घोटाले ते ऑनलाईन धमकियें कन्ने जुड़े दे मामले च बाददे पर लौ पाई। सिंह होरें नागरिकें गी अपील कीती जे ओह साईबर खतरें बारे अपने आपै गी सूचित करने ते साईबर अपराधें दा शिकार होने थमां बचाने लेई डिजिटल प्लेटफार्मे दा इस्तेमाल करदे बेल्ले लोड़चदी ऐहतियात बरतन। इस मौके पर बोलदे होई एस.एस.पी. होरें आखेया..

<><><><><><>

#### Temp Drop

जम्मू-कश्मीर च जंदे रोज मती ऊंचाई आहली थहारें पर इस मौसम दी पैहली बर्फबारी होई, जिसलै के भारी बरखा करी मदानी इलाकें बी खासे प्रभावत होए न। मौसम च चानचक्क आई दी इस तब्दीली कन्ने तापमान च तेजिया कन्ने गिरावट आई ऐ, जेदे कन्ने केन्द्र शासत प्रदेश च स्याले दी शुरुआत दा संकेत थोआ ऐ। आकाशवाणी जम्मू दे संवाददाता मुजब पूरे केन्द्र शासत प्रदेश च बद्दो-बद्द तापमान सामान्य शा घट्ट रेया। श्रीनगर च दिनै दा तापमान औसत कोला घट्ट 12 इशारिया 5 डिग्री सैल्सियस दर्ज कीता गया। जम्मू खिते च बनिहाल च 11 इशारिया 2 डिग्री सैल्सियस, भद्रवाह च 10 डिग्री सैल्सियस, बटोत च 12 इशारिया 6 डिग्री सैल्सियस ते कटरा च 18 डिग्री सैल्सियस तापमान दर्ज कीता गया। पीर की गली, राजदान टॉप, साधना दर्रा, सिंथन टॉप, डक्सम, गुलमर्ग ते मिनीमर्ग जनेह इलाकें च ताजा बर्फबारी दी सूचना ऐ।

<><><><><><>

## Highway Closed

जम्मू-श्रीनगर राष्ट्रीय जलमय शिडक केई सारी थाहरें पर लहास-पस्सियां ते कुप्पड़ पौने ते शिडक पर गार आई जाने करी गड्डिएं दी आओजाई लेई बंद। आकाशवाणी जम्मू संवाददाता दी रिपोर्ट मूजब एह शिडक फिलहाल आओजाई लेई बंद ऐ की जे एह इसलै यातायात लेई सुरक्षित नेई ऐ। ताआई, ऐतिहासिक मुगल रोड जेड़ी जम्मू खिते दे राजौरी ते पुंछ जिले गी घाटी दे शोपियां जिले कन्नै जोड़दी ऐ, ओह बी उच्चिएं धारें पर बर्फबारी होने मगरा गड्डिएं दी आओजाई लेई बंद ऐ। प्रशासन नै लोकें गी हिदायत कीती ऐ जे ओह शिडक दे पूरी चाल्ली बहाल होने मगरा गै आवाजाई करन।

<><><><><><>